

DE  
VICTORINO  
EPISCOPO  
ET MARTYRE  
DISSERTATIO.

*Ad CHRISTOPHORVM FAVVÆVM  
Parisiensẽ Theologum, Canonicum &  
Officialem Pictaviensẽ.*

Auctore IOANNÈ DE LAVNOY Con-  
stantiensi, Theologo Parisiensi.



PARISIIS,  
Typis EDMUNDI MARTINI, viâ Ia-  
cobæâ, sub Sole aureo.

---

M. DC. LIII.  
CVM PERMISSV.

Sanctus Matthæus cap. XXI.

*Reddite quæ sunt Cæsaris, Cæsari;  
& quæ sunt Dei, Deo.*



# DE VICTORINO

## EPISCOPO ET MARTYRE

### DISSERTATIO.

*Ad CHRISTOPHORVM FAVVÆVM  
Parisiensem Theologum, Canonicum &  
Officialem Pictaviensem.*



**V**ICTORINVM, qui furente in Christianos Diocletiano fecit martyrium, FAVVÆ DOCTISSIME, Pictaviensem fuisse Episcopum, scriptores multi quingentis circiter abhinc annis memorix prodiderunt. In iis Pictavienses & domestici sunt quidam; alienigenæ & extranei sunt alij. Pictavienses & domestici celebriores ætate nostra vixerunt, Ioannes Beslius, & ab eo inductus Henricus Ludouicus Castanæus Rupipozæus loci Episcopus, ambo de literis ceteroqui benè meriti. Alienigenæ & extranei, cùm hocce tempore, tum ante illud floruerunt. Antiquiores iuniori-

bus facem prætulerunt ad lapsum, errandique viam munierunt. Vtrosque fefellit non ab simile patronymicum alterius vrbis, cuius Ecclesiam Victorinus administravit. Pictaviensem, & Petauionensem, seu Pitabionensem Episcopum pro vno eodemque acceperunt. Errarunt ipsimet, & cum errarent, perperam crediderunt erratum ab iis, qui apud beatum Hieronymum & alios auctores Petauionensem seu Pitabionensem descripserant. Talis nominum similitudo similes quondam errores peperit, & scriptoribus egregiis tenebras offudit. Cyprianus Carthaginensis idem habitus, atque Cyprianus præstigiator, postea martyr; Nouatianus cum Nouato confusus; & Nicea Thraciæ in Nicæam Bithyniæ conuersa est. Sed nihil suppetit admodum, cur ista doceam te, qui me vt adepti in Theologia magisterij tempore, ita & doctrinæ copia antecedis: si tamen quod est perexiguum in me, copia dici possit. Quod meriti tui genus & vitæ probitas effecerunt, vt pridem illustris Antistes, & eo nuper mortuo Pictaviensis Clerus Ecclesiæ te Vicarium dederit & Officiale, qui humana iura dispensares. Id & Cleri

propria laus est, & tua. Cleri quidem, quòd iudicem, qui nescio quo demonstrandæ potestatis consilio mutari solet, non mutauerit; Tua verò, quòd non mutandi causam omnem obtuleris rei benè administratæ euidentiâ. Haftenus igitur iura dispensas communi vtilitate, non propria, munusque tuum exequeris omnino, contrà quàm Officiales executos fuisse suo sæculo Petrus Blesensis scribit. Hinc tibi æquè mihi gratulor, quòd semper egeris agasque Officialem singularis exempli, etiam si olim extitisses. Hoc autem quantulumcumque opusculum, quod meditor, in tuo debuit nomine apparere. Id postulant multæ & veteres causæ necessitudinis, quæ nos eadem in Academia, iisdem in studiis, eodem in contubernio coniunxit: deinde literarum commercium, quod mihi tecum est in singulas hebdomadas; quòdque mutuam inter nos charitatem subinde redaccendit: tum ipsa scribendi materies, quæ hinc facultate & otio tuo dignissima videtur, inde tangit Ecclesiam, cui tua virtus & eruditio plurimùm splendoris importat: postremò nonnulla rationum momenta, quæ mihi pro tua eximia in rebus Pictauo-

## 6 DE VICTORINO EP. ET M.

rum cognitione subministrasti. Æquum enim erat, ut illuc refluerent, unde scaturierant. Refluere tamen nequeunt cum cofermonis nitore, qui tibi cum sit proprius, mihi communis esse non potest. Interim refluunt sine fuco. solum erit tuum videre, num aliquid ex tuis momentis profecerim. Porro Victorinum non Pictaviensem in Aquitania II. sed Petauionensem seu Petabionensem in superiori Pannonia claruisse Episcopum tam multa confirmant, ut cur alij senserint aliter, id admirationem habet quam maximam. De his verò multis pauca, sed præcipua delibo. Tum nonnullas ad Dissertationem observationes adicio, quibus vel eadem illustratur amplius, vel quæ futura sit eiusdem utilitas, explicatur.

### CAPVT PRIMVM.

*Argumentum ducitur ex Beati Hieronymi locis quinque.*

**Q**VONIAM verò huius sermonis ordiendi princeps est Hieronymus, in medium adduco quinque illius loca, quorum duo extant in libro de viris illustribus. Vnus in Papia Hierapolitano Episco-

po: *Tertullianus quoque, inquit, in libro de spe fidelium & Victorinus Pictauiensis, & Lactantius hac opinione ducuntur*: ita editio Veneta anni M. CD. LXX. Huic editioni reipsa consentiunt plures antiqui manuscripti codices, vnus sancti Germani Prætenſis ad Lutetiam, alter sancti Victoris ad eandem urbem, vbi *Petauionensis*, tertius Bibliothecæ regiæ, quartus Bibliothecæ Puteanæ vbi *Pitabionensis*, quintus Monasterij Beatæ Mariæ de Longoponte, sextus Monasterij Beatæ Mariæ de Valle; duo in Bibliotheca Thuana notæ probissimæ. Ex his autem quæ certiora sunt, corrigenda est editio Romana anni M. CD. LXVIII. & M. CD. LXX. Moguntinensis eiusdem anni M. CD. LXX. Veneta anni M. CD. XXCVIII. Basiliensis anni M. CD. XCII. M. D. XVI. M. D. XXIV. M. D. XXVI. M. D. LIII. M. D. LXV. Lugdunensis anni M. D. XXX. Romana M. D. LXI. & quæ consequuntur editiones aliæ, in quibus *Pictauiensis* exaratur.

Alter in Victorino ipso: *Victorinus Pitabionensis Episcopus non aequè Latine vt Græcè nouerat. Vnde eius opera grandia sensibus, viliora videntur compositione verborum. Sunt*

## DE VICTORINO EP. ET M.

*autem hæc, Commentarij in Genesim, in Exodum, in Leuiticum, in Esaïam, in Ezechiel, in Abacuc, in Ecclesiastem, in Cantica Canticorum, in Apocalypsim, & aduersus omnes hæreses, & multa alia. Ad extremum martyrio coronatus est. Ita Romana editio anni MCDLXVIII. & MCDLXX. Moguntinensis eiusdem anni MCDLXX. Basiliensis anni MDXVI. MDXXIV. MDXXVI. MDLIII. MDLXV. Lugdunensis anni MDXXX. Sixtus Senensis libro VI. Bibliothecæ sacre annot. CCCXLV. & annot. CCCXLVII. Bellarminus libro de scriptoribus Ecclesiasticis: His omnibus adstipulantur manuscripti codices, vnus sancti Germani, alter sancti Victoris, tertius Bibliothecæ Regiæ, quartus Puteanæ, quintus Monasterij Beatæ Mariæ de Longoponte, sextus Monasterij Beatæ Mariæ de Valle, duo in Bibliotheca Thuana notæ probissimæ. Ex his autem corrigenda est editio Veneta anni MCDLXX. & MCDXXCVIII. Basiliensis anni MCDXCII. & Romana anni MDLXI & consequentes aliæ, in quibus *Pictauionensis* legitur.*

Tertius in epistola contra Vigilantium.  
*Taceo de Victorino Pictauionensi & ceteris,*



qui *Origenem in explanatione scripturarum secuti sunt & expresserunt.* Ita Romana editio anni MCDLXVII. & MCDLXX. Moguntinensis & Veneta eiusdem anni MCDLXX. Veneta anni MCDXXCVIII. Basiliensis anni MCDXCII. MDXVI. MDXXIV. MDXXVI. MDLIII. MDLXV. Lugdunensis anni MDXXX. His editionibus opitulantur manuscripti codices, vnus sancti Victoris, alter Nauarrici Collegij in Academia Parisiensi, tertius Bibliothecæ Tillianæ, quartus Monasterij B. Mariæ de Longoponte, quintus Monasterij S. Ioannis de Vineis apud Sueffiones, sextus Antonij Loifelli illustris quondam in senatu caufidici, septimus Claromontani Collegij Paris. S. I. annorum plus minus octingentorum, octauus FF. Prædicatorum S. Mariæ Annunc. Paris. nonus Florentinus manuscriptus anno MDCXXCIV. qui est in Bibliotheca Regia; tres in Thuana, quorum duo sunt antiquissimi. Ex his autem corrigenda est Romana editio anni MDLXI. & consequentes aliæ, in quibus *Pictaniensis* reponitur. Mirifica est editionum omnium cum manuscriptis consensio ante Romanam illam editionem, quæ à Ma-

riano Victorio deprauata fuit.

Quartus in libro contra Heluidium sub finem : *Tertullianum in testimonium sibi vocat, & Victorini Pictabionensis verba proponit.* Ita Romana editio anni MCDLXVIII. & MCDLXX. Veneta anni MCDLXX. & MCDXXCVIII. Basiliensis anni CDXCII. Accedunt manuscripti codices, vnus Nauarrici Collegij, alter Bibliothecæ Tillianæ, tertius Monasterij B. Mariæ de Longoponte, quartus Monasterij B. Ioannis de Vineis apud Sueffiones, quintus Claramontani Collegij Paris. annorum plus minus octingentorum, sextus FF. Prædicatorum S. Mariæ Annunc. Paris. septimus Florentinus iam memoratus; duo S. Victoris, quorum alter est annorum circiter sexcentorum; tres Bibliothecæ Thuanæ, quorum duo sunt antiquissimi. Ex his autem corrigenda est Moguntinensis editio anni MCDLXX. Basiliensis anni MDXVI. MDXXIV. MDXXVI. MDLIII. & MDLXV. Lugdunensis anni MDXXX. Romana MDLXI. & consequentes aliæ, in quibus *Pictauiensis* apparet.

Quintus denique locus in cap. 36. Ezechielis : *Quod multi nostrorum, & præcipue*

*Tertulliani liber, qui inscribitur de spe fidelium, & Lactantij institutionum volumen septimum pollicetur, & Victorini Pitabionensis Episcopi crebra expositiones. Ita Basiliensis editio anni MDXVI. MDXXIV. MDXXVI. MDLIII. & MDLXV. Lugdunensis anni MDXXX. Consentiant manu exarati codices, vnus Monasterij B. Mariæ de Longoponte, alter S. Germani Saxonice formæ literis depictus, qui ad ætatem Caroli Magni pertinet, vel certè filiorum. Hic autem cùm ea conditione pluribus æquiualet, satis esset: vnde necessariò corrigenda est Romana editio anni MDLXI. de qua Victorius sic in notis ad illud cap. *Pitabionensis falsò antea legebatur. quem errorem Sophronius introduxit, dum non rectè Latinam vocem Gracè in Catalogo reddidit.* Ego contrà vehementer contendendo, id nunc falsò legi, quod rectè antea legebatur, & Victorium perinde inani atque falsa ductum suspicione veterem scripturam mutasse. Inprimis à quo didicit, Sophronium Latinam vocem, qua vsus est Hieronymus, non rectè vertisse? Id enim gratis pronuntiat, quod summa cum ratione pronuntiandum fuit. Et sanè Pitabionem inter & Pictauum Victorius ipse vi-*

detur ignorare discrimen, quod Sophronius agnouit, vti secundum argumentum euidenter ostendet. Deinde supponit Hieronymi Catalogum Latine scriptum perisse, eumque qui extat, haberi ex Græca Sophronij versione, quam quis Latine sit interpretatus. Id quod in hoc rerum genere sic est falsum, vt falsius esse nihil possit. Supersunt hodièque plura Latine editionis manuscripta exemplaria, quibus cum Græca Sophronij versio non coniungitur, & in quibus Victorinus *Pitabionensis* legitur, non *Pictauiensis*. Erasmus primus, opinor, est, qui iam edito Romæ, Venetiis, & Moguntiae Latino Hieron. Catalogo Græcam Sophronij versionem adiunxit, dum Basileæ an. MDXVI. omnium Hieronymi operum editionem curauit. Tum etiam si fingeremus Sophronium id fecisse, quod eum fecisse vult Victorius, non inde consequeretur, corruptam esse vocem, quæ ex Hieronymi commentario in Ezechielem refertur. Quippe oportuisset vel à Sophronio commentarium illum Græcè redditum fuisse, vt pari modo vitaretur, vel prius à librariis, qui descripserunt commentarium, descriptum fuisse.

se Catalogum, ut ex eo haustum ac libatum errorem, in eundem commentarium postea transfunderent. Enimuero primum nemo somniabit mortalium, secundum nonnisi ariolus quispiam & vanus coniector affirmabit.

## CAPUT II.

*Argumentum ex Sophronio, qui librum  
Hieronymi de viris illustribus  
Græcè vertit.*

**F**UT æqualis Hieronymi, ut creditur, Græcus auctor nomine Sophronius, qui librum illius de viris illustribus, seu de scriptoribus Ecclesiasticis in suam linguam traduxit. Hic de Victorino sic in Papiæ loquitur: ὁ Τερτυλλίανος ἐν τῇ βίβλῳ τῇ περὶ τῆς ἐλπίδος τῆς πίστεως, ὁ Βικτωρίνος πεταβίου· ὁ Λακταπίος ταύτῃ τῇ δοκίμῃ εἰληκώτα. Deinde in ipso Victorino: Βικτωρίνος πεταβίου ἐπίσκοπος &c. Quod autem in priori loco πεταβίου non significet Pictaviensem, Sophronius ipse sibi testis est in Hilario Pictauorum Aquitanix Episcopo: Ἰλάριος, inquit, πικταβίαν ἀκοι-

ταίας ἐπίσκοπος. Nam ὑπὸ τῆς πεταβίων  
 non diceretur πεταβῖνος, ut Sophronius lo-  
 quitur, sed πεκταβῖνος. In posteriori loco  
 res est adhuc clarior. Sophronius enim Vi-  
 ctorinum vocat πεταβίωνος Episcopum, &  
 Hilarium τῆς πεκταβίων ἀκοιτανίας. Socra-  
 tes libro III. hist. Ecclesiast. cap. VIII. &  
 Sozomenus lib. v. eiusdem hist. cap. XII.  
 Hilarium non πεταβίωνος, sed πεκτάβων,  
 vel πεκταβίων, hic τῆς πόλεως ἀκοιτανίας, il-  
 le τῆς πόλεως δευτέρας ἀκοιτανίας Episco-  
 pum appellant. Ex quo manifestè constat,  
 Sophronium πεταβίωνος nomine πεκτα-  
 βίου seu πεκτάβου non intellexisse. So-  
 phronius quidem scribit primam patro-  
 nymici syllabam per ἐψλόν, & primam  
 nominis syllabam per ἰῶτα: sed querere  
 istius rei causam aliena est ab hoc propo-  
 sito difficultas. Nam siue sit error librarij  
 siue non sit, inde non sequitur, idem au-  
 ctori nostro πεταβίωνος, atque τῆς πεκτα-  
 βίων Episcopum sonare.



## CAPVT III.

*Argumentum ex inscriptione Commentarij Victorini in Apocalypsin.*

**M**ARGARINVS Bignæus Parisiensis Theologus Bibliothecæ Patrum intulit Commentarium, quem Hieronymus à Victorino Petauionensi editum in Apocalypsim modò testatus est. Sic autem inscribitur : *Commentarius Victorini Pitabionensis in Apocalypsim* : quem hoc modo laudat Sixtus Senensis libro VI. Bibliothecæ annot. CCCXLV. & CCCXLVII. *Victorinus Pitabionensis hac habet in Commentariis Apocalypscos.* Sic inuenerant in antiquis manuscriptis codicibus, qui emendatricem in peius librariorum manum experti non erant, & incorrupti ad illud usque tempus perueniant.



## CAPVT IV.

*Argumentum ex tribus antiquis manuscriptis codicibus de Scripturis authenticis & apocryphis.*

**E**XSTAT Lutetiæ Claromontano in Collegio vetus codex manu ante sæcula non pauca exaratus, qui Scripturarum & Canonicorum librorum notitiam repræsentat, vbi hæc leguntur : *opuscula Victorini Petauionensis apocrypha*. Huius codicis, quem celebris ille eruditio- num parens Iacobus Sirmondus, dum viueret, communicauit mecum, anno- sitatem præferunt & alia multa, & ad- iectus quoque Romanorum Pontificum catalogus, qui desinit in Felicem huius nominis quartum, scilicet in annum Christi DXXX. Nisi huius sit ætatis exem- plar, est certè exemplum, quod quis postea descripserit fideliter. Extat etiam in Mo- nasterio Beatæ Mariæ de Valle similis Scripturarum notitia, quæ *opuscula Victori- ni Piëtationensis apocrypha* denotat. Extat quoque



quoque in Bibliotheca sancti Victoris manuscripta quingentos ante annos Isidori collectio, quæ *opuscula Victorini Pictauiensis apocrypha* designat. Hæc autem cum ita sint, facile perspicitur, in editum Burcardi decretum, & in luonis tam editum, quàm manuscriptum, quod habent Bibliothecæ plures, errorem irrepisse, quatenus in eo Canonorum librorum indice *opuscula Victorini Pictauiensis apocrypha* demonstrantur; in Burcardi lib. III. Decret. cap. CCXXI. In luonis part. IV. Decr. cap. LXV. De recentioribus seu editis seu manuscriptis commentariis error, de antiquioribus æstimanda est veritas. At Burcardi & luonis Decreta veteres illi duo codices, & Isidori collectio longa temporis intercapedine antecedunt.

## CAPUT V.

*Argumentum ex martyrologiis Vsuardi  
& Adonis.*

**V**SVARDVS Monachus sancti Germani Parisiensis, qui Carolo Magno Imperatore, & Ado Viennensis Episco-

pus, qui Ludouico II. floruit, antiquam de Victorino Petabionensi traditionem retinent in suis martyrologiis. Sic autem Vsuardus scribit ad quartum nonas Nouembris: *Natalis Beati Victorini Pitabionensis Episcopi, qui post multa documenta, ut sanctus Hieronymus testatur, in persecutione Diocletiani martyrio coronatus est.* Cui rei fidem faciunt non edita modò, sed etiam manuscripta quinque Vsuardi exemplaria, quæ in Monasterio sancti Germani inspeximus & contulimus. Sic quoque tradit Ado ad eundem diem: *Natalis sancti Victorini Pitabionensis Episcopi, qui in persecutione Diocletiani martyrio coronatus est.*

His accedit martyrologium illud, quod ad exemplaria tria Parisiense, Lugdunense, & Ticinense recognitum Rothomagi prodiit anno Christi MDVII. ad usum Romanæ & ceterarum Ecclesiarum. In hoc Martyrologio eadem Vsuardi verba repetuntur. Quò factum est, ut Vsuardus confirmet germanam Hieronymi lectionem, quæ controuersiae finem imponit, & quæ postmodum vitata ab imperitis, viros peritissimos decepit. Ex his autem corrigenda est Veneta Romani Martyrologij edi-

# DISSERTATIO.

tio anni MDXLIX. & Romana per Galefinum & Baronium recensa, vbi omnia Vsuardi verba referuntur, præterquàm quòd *Pictauiensis* dicatur loco *Pitabionensis*. Deceptus ab editore Veneto Galefinius errorem imbibit, & postea Baronio propinauit, atque aliis, qui ex Baronij commentariis sapere consueuerunt. Atenim Baronius forsàn probat in martyrologio retinendum esse *Pictauensem*, non restituendum *Pitabionensem*. Minimè verò. Sed de iis, quæ perperam adducit, postea commodiùs. Hic opponendus non est Gregorius XIII. qui ad Martyrologium pondus adiecit auctoritatis suæ. Pontifex enim non magis potuit efficere, vt qui Victorinus *Pictauiensis* Episcopus non extitit, *Pictauiensis* nihilominus extiterit, quàm, vt Synoris Antiochena Virgo & Martyr fuerit, effecit. Synoris appellatiuum nomen est, quod Galefinius & Baronius proprium reddiderant. A multis admonitus culpæ Baronius expunxit ista, quæ in prima Martyrologij editione leguntur ad nonum Calendas Februarias: *Ibidem* (Antiochiæ) *sancta Synoridis martyris*.

## CAPVT VI.

*Argumentum ex tribus aliis Martyrologiis, uno recens edito, & duobus manuscriptis.*

**E**X his primum est Martyrologium Monasterij sancti Laurentij Bituricensis, vetus quidem, sed nuper editum in lucem. *Natalis, inquit, sancti Victorini Pictabionensis Episcopi, qui post multa documenta, ut sanctus Hieronymus testatur, persecutione Diocletiani martyrio coronatus est. Quæ sunt ipsissima Vsuardi verba. sed ea siue Vsuardus à conditore huius Martyrologij, siue hic ab Vsuardo mutuatur, vterque eadem traditione succinctum se prodit. Alterum sancti Stephani Autissiodorensis vetustissimum, quod asseruatur in Bibliotheca Thuana: iv. nonas Nouembris: eodem die natalis sancti Victorini martyris Pictabionensis Episcopi. Vetustissimum censerì debet non tempore scriptionis, quia natalem Beati Thomæ Cantuariensis continet, sed compositione verborum. Nam*

exaratum est ad formam veterum eiusmodi librorum, qui pauca de singulis Martyribus aut Confessoribus habent. In summa quo breuiores & simpliciores hi libri, eo antiquiores, nisi forsan redacti in compendium, existimari solent. Tertium sancti Victoris Parisiensis, in quo dicitur: *Natalis Beati Victorini Pitabionensis Episcopi, qui sub Diocletiano Imperatore martyrio coronatus est.* Hæc eadem apud Adonem referuntur.

---

## CAPVT VII.

### *Argumentum ex prima Conciliorum editione.*

**I**ACOBVS Merlinus Parisiensis Theologus primam Conciliorum omnium quæ reperire potuit, editionem Lutetiæ curauit anno MDXX. Hæc editio post decennium Colonienfes typos occupauit. In vtraque editione *opuscula Victorini Pitabionensis apocrypha* reponuntur. Hæc autem editio, quæ antiquis & probæ notæ codicibus fulcitur, vim deinceps passa est. Nam Petrus Crabbus alter Conciliorum

editor ex Pitabionensi Pictauiensem fecit. Crabbum secuti sunt alij eorundem Conciliorum editores Laurentius Surius, Dominicus Nicolinus, Seuerinus Binius. Vt veritatis, ita & erroris fontem indicasse sufficit, quò emendatrix postea manus apponatur.

---

## CAPVT VIII.

*Argumentum ex Romanis Gratiani  
correctoribus.*

**G**REGORIUS XIII. Pontifex cùm Galia multa, tum illud studiosè præstitit, vt Gratiani Decretum ad vetera exemplaria recognosceretur. Recognouerunt graues & eruditi viri, & adscripserunt ad marginem Capitis Sancta Romana Ecclesia dist. xv. *opuscula Victorini Pictauiensis Episcopi, aliàs Pitabionensis.* Et rectè quidem, cùm veteres librorum authenticorum & apocryphorum notitiæ, quas iam laudauimus, *opuscula Victorini Pitabionensis* repræsentent.

## CAPVT IX.

*Argumentum ex silentio Fortunati Pictauiensis Presbyteri, & Gregorij Turonensis Episcopi.*

**S**I Victorinus Martyr Pictauiensis fuisset Episcopus, profectò aliquis ante Fortunatum, vel Fortunatus ipse Victorini certamen literis mandasset, aut nonnullo saltem carmine celebrasset. Qui Seuerini Burdegalensis, qui Germani Parisiensis, qui Albini Andegauensis res gestas memoriæ prodidit, qui diuersorum Martyrum & Confessorum virtutes & miracula poëmatibus commendauit suis, cur illaudatum præteriisset Martyrem, qui primus apud Pictauos Christianam religionem suo sanguine consecrasset? Fortunato Gregorium Turonensem adiungimus, qui de Victorino Martyre verbum nullum facit in historia, vel in opere, quod de Martyribus composuit. Quis autem prudens & attentus non videt, vtriusque silentium obruere quicquid excogitari po-

b iiij

test, ad recentis admodum opinionis, nisi dicam veriùs, hallucinationis defensionem?

---

## C A P V T X.

*Argumentum ex prisco more Christianorum, qui suos Martyres nunquam incelebratos dimiserunt.*

**V**ETVS fuit Christianorum institutum, vt aris, puluinaribus, templis, sacrificulis honestarentur antistites, qui primi in aliqua vrbe veram religionem martyrio aut illustri confessione consecrauerant. At neque in vrbe, neque in pago Pictauiensi vlla est Ecclesia, Monasterium vllum, vlla ædícula, quæ Victorinum Episcopum & Martyrem hætenus sibi vindicauerit patronum. Deinde Ioannes Bouchetus, qui centum & viginti abhinc annos & ampliùs Aquitanix historiam edidit, de aliis Episcopis ex ordine loquitur, sed de Victorino Pictauiorum Episcopo scriptum nihil reliquit. Tum denique nullum extat ante annos quadra-



ginta Pictauiensis Ecclesiæ Breuiarium, Calendarium nullum, Manuale nullum, nullæ Litanix, nullustandem Ecclesiasticarum rerum codex, in quo Victorini Martyris nomen commendetur. Id autem de cuius ciuitatis nobilissimo apud veteres Apostolo, vel Martyre factum est vnquam? quo id fuisse factum exemplo probaretur? hoc momentum non vrgeo amplius, cùm res ipsa suo lumine manifesta reddatur.



*Nonnullæ in expositam de Victorino Pictauiensi Episcopo & Martyre traditionem obseruationes.*

**P**RÆTER ea, quæ suis identidem locis corrigenda monuimus, supersunt quædam alia, quæ adhuc curiosius animaduertantur. Non enim quolibet in loco quodlibet dicere licuit, ne rationes nostræ σφαλμάτων corrigendorum multitudine obruerentur. Sua est cuique rei dicendæ alia atque alia opportunitas.

## OBSERVATIO PRIMA.

*De variantibus in Petauionensi, Petabionensi,  
Pictauionensi, & Pitabionensi codicibus.*

**N**EMINI debent negotium facessere, cum manu exarati, tum typis mandati codices, qui nunc *Petabionensem*, nunc *Petauionensem*, nunc *Pictabionensem*, nunc *Pitabionensem* Episcopum repræsentant. Quod nostri, id est, Christiani scriptores in patronymico fecerunt, id quoque in ipso nomine antea fecerant externi. Nam Tacitus lib. III. hist. scribit *Petauionem*, cum de hac vrbe sic loquitur: *Meliore fato fidèque Flauianarum partium duces belli consilia tractabant, Petauionem in hiberna XIII. legionis conuenerant.* Æthicus in Cosmographia cum celebrioribus oppidis, quæ Oceanus Occidentalis habet, *Pætauionem* adnumerat: deinde dum sermonem de huius Oceani fluminibus instituit, *maris Pætauionensis* ita meminit: *Bicornius ducit à mari Pætauionensi usque ad mare Tyrrhenum contra insulas Baleares.* Antoninus Imperator in Itinerario prouinciarum, eandem scripturam retinet à *Vindobona Pætauione* M. P. CLXXXIV. sic &c. à *Pætauione Siscia* M. P. C. sic &c. An-

toninum sequuntur Tabulæ Peutingeri. Ammianus Marcellinus Petabionem dicit lib. XIV. hist. *Taurus quæstor venit Petabionem oppidum Noricorum.* Ptolemæus à Petro Bertio recognitus lib. II. cap. XV. exhibet *παταβιον* & *Pætaviūm*. Hæc autem cum ita se habeant, nostri scriptores ad Taciti, Æthici, Antonini, veterum tabularum, & Ammiani exemplum modò Petauionensem, modò Petabionensem describunt.

Quòd autem in certis quibusdam codicibus *Pictauionensis*, pro *Petauionensis*, inueniatur, error est semidoctorum libreriorum, qui rectè scriptum vocis istius initium mutarunt. Scilicet cum *Petauionem*, unde *Petauionensis* dicitur, non cognoscerent, *Pictauum* verò *Pictauis*, *Pictaniūm* apud ætatis mediæ scriptores legerent, ex eo vocis nostræ principium malè correxerunt. Verùm, quia *Pictauionensis* rectè dici nequit, hic error & seipsum destruit, & antiquam orthographiam confirmat. *Petabionensis* quoque dicitur à *Petabione*, quod oppidum ita nominat Ammianus Marcellinus. Sed *Petauionensis* dicitur rectiùs. Nam Peta-

uio Germana est nomenclatio, quam auctores Latini apprimè nouerant, Tacitus, Antoninus, & qui veteres imperij tabulas delinearunt. Verùm quam urbem Græci appellant *πεταβίονα*, Marcellinus genere Græcus, Latinè scribens *Petabionem* appellat: è Græca voce Latinam fecit, cùm Latina uti deberet. In pluribus editis & manuscriptis exemplaribus legitur *Pitabionensis* non *Petabionensis*, sed si res ad Latinam vel Græcam recenseatur originem, id comperietur scribarum vitium esse. Vtrobique *Petauio* & *πεταβίον*, non *Pitauio* aut *πεταβίον* exaratur. Græci quidam in eadem voce ε in ι mutant pro varia Dialectorum ratione. sed hoc ad Latinos quid attinet? Ptolemæi verò tabulæ nisi corruptæ sint, auctori placuit *Petauionem* reddere *πεταύβιον*: quæ duo nomina parum inter se habent affinitatis. Porro sicubi, quod facilè credo, media in voce patronymicâ litera vna mutatur in aliam, quærendum non est mysterium, sed notariorum incuria sola culpari meritò potest.

## OBSERVATIO II.

*Emendatus quidam Optati Mileuitani locus.*

VM iam certo certiùs constet, Victorinum Petauionensem, seu Petabionensem non Pictaviensem fuisse Episcopum, credendum est omnino, accidisse librariorum culpa, ut apud Optatum Mileuitanum libro 1. sic legatur: *Marcion, Praxeas, Sabellius, Valentinus, & ceteri temporibus suis à Victorino Pictaviensi, à Zephirino Urbico, & Tertulliano Carthaginiensi usque ad Cataphrygas, & ab aliis assertoribus Ecclesie Catholicae superati sunt.* Hoc autem loco pro, *Pictaviensi*, reponendum est, *Petauionensi*, seu quod idem est, *Petabionensi*. Franciscus Balduinus in prima Optati editione reliquit, *Pacatiensi*, quæ aliena & fictitia vox est. Eam retinuit Petrus Vielus Parisiensis Theologus, qui huius editionis Optatum Gallicè vertit. Idem Balduinus in alia editione pro *Pacatiensi* posuit *Pictaviensi*. nec rationem talis mutationis ullam reddidit. Secutus est opinor corruptum codicem, aut Hieronymum,

quem Marianus Victorius Romæ perperam emendat. Non dissimulauit tamen mendosos fuisse Optati libros, & restare multa, quæ adhuc post suas curas correctorem exigent: adscribo illius verba, quibus vtrumque testatur in editione Parisiensi anni MDLXIX. Porro, inquit, *cum veterum, præsertim Afrorum libri Latinè scripti multis librariorum mendis contaminati sint, vix ullum puto unquam fuisse magis deprauatum, quàm hunc Optati libellum. Nam & ipsi Donatista statim atque editus fuit, eum corrumperunt, & ut erant impudentes, discerptum inquinarunt, & barbara librariorum posteritas multis maculis propè oppressit. Itaque & multis seculis, tanquam in sepulchro delituit, & cum in lucem eum protulit Cochlei editio Germanica, plura menda fuerunt, quàm versus. Ego in priori editione Parisiensi operam dedi adiutus collatione exemplaris manuscripti, quod mihi communicauerat Espenceus Theologus, ut sexcentos saltem locos emendarem. Nunc non multò pauciores emendabit altera hæc editio duobus manuscriptis, seu chirographis exemplaribus subnixæ, quorum alterum Ioanni Tilio Episcopo Meldensi, alterum Macereo Theologo Parisiensi debemus. Multum tamen abest,*

*ut dicam Optatum nunc tandem in integrum planè esse restitutum. Imò feci ut lacunarum nota indicarent, aliquot locos superesse etiamnum mutilos.* Hæc ille in exordio suarum Annotationum. Gabriel Albaspinæus Aurelianensis Episcopus, & Mericus Casaubonus Isaaci filius Optati editionem eodem anno MDCXXXI. curarunt, hic Londini, ille Lutetiæ, & in *Victorino Pietauiensi* nihil correxerunt. Quinetiam Albaspinæus cum dixit in suis notis Victorinum *multa scripsisse teste diuo Hieronymo, quorum ne paginam quidem habemus*, profectò non adiecerat oculos ad Bibliothecam Patrum, in qua huius auctoris commentarij in Apocalypsim reperiuntur. Optatus verò cum Victorinum collocat in eorum ordine, qui Marcionem, Praxeam, Sabelium, Valentinum, & ceteros hæreticos suis operibus contriuerant, respicit ad libros, quos *aduersus omnes hæreses* edidisse tradit Hieronymus libro de viris illustribus.

Ceterum correctiorem Optati editionem meditabatur Nicolaus Rigaltius vir cum aliis omnibus, tum Africanis maxime disciplinis excultissimus, quem pæne octogenarium mors immatura nuper abri-

puit Tulli Leucorum ad VII. Calendas Martias : Immaturam dico mortem, quia deberent in multa sæcula viuere, qui publicis vtilitatibus & studiis inferuiunt. Qua ratione immaturior fuit adhuc excessus Petri Puteani viri quoque præstantissimi, & ad iuuandas artes omnèque officij genus nati, cuius vitam cum in lucem dedit Rigaltius, propriam statim amisit. quasi rerum omnium arbiter præpotens Deus noluerit auctorem operi tam egregio, quàm necessario superesse. Non homo quidem supererit, sed hominis memoria, quandiu supererunt literæ, quia Puteanus æquè ac Rigaltius æternùm futura sunt nomina, vt bonorum ciuium, ita & literarum. Istud fortasse πάρεργον videbitur, sed hîc μείζον τῷ ἔργου censeo, non imitatus illos, qui hoc idem, sed alia mente prouerbium, aut aliquid simile fecerunt. Scilicet in gratiam est duorum hominum, quibus debetur æternitas, qui eo ipso chari omnibus semper erunt ac desiderandi, quòd in vita cum essent, relictis pluribus monumentis prospexerint, ne desiderarentur.



## OBSERVATIO III.

*Honorius Augustodunensis, Demochares, Possevinus & Miræus corriguntur.*

SECUNDVM ea, quæ argumentis decem exposuimus, nullum est dubium, quin isti scriptores quatuor errauerint, quando Victorinum appellarunt *Pictauiensem* Episcopum. Honorius quidem in catalogo Sanctorum, nisi fortean error in librarios transferatur. Etenim cum *Pictauiensis* & *Petauionensis* seu *Petabionensis* non multum inter se differant, *Petauionensis* seu *Petabionensis* in *Pictauiensem* facile conuerti potuit à librariis, qui vtrum in orbe sit vrbs dicta *Petauio*, seu *Petabio*, nescirent.

Demochares libro III. de sacrificio Misæ locutus de primo *Pictauorum* Episcopo semel atque iterum errauit. Illius verba sunt: *Primum constituemus Episcopos per ordinem sedis Pictauiensis, quorum sequitur numerus iuxta Bouchetum in Annalibus Aquitania: Sanctus Victorinus, seu Nectarius in catalogo Sanctorum libro 10. & in catalogo Scriptorum Ecclesiasticorum anni 1561. In primis fal-*

litur significans, Bouchetum Victorini meminisse. Non enim meminit, tantum abest, ut pro vno & eodem Episcopo Victorinum & Nectarium computarit. Deinde fallitur, dum eandem confusionem in vtrumque illum catalogum transfert. Neque enim Petrus Equilensis Episcopus in catalogo Sanctorum, neque Marianus Victorius in Hieronymi catalogo Script. Ecclesiastic. qui Romæ cum reliquis operibus prodierat anno MDLXI. Nectarium Pictaviensem Episcopum attingunt. Demochares in hunc geminum errorem venit, cum ex vna parte in Pictaviensium Episcoporum indiculo, quem Bouchetus confecerat, Nectarium primum, nec vllum Victorinum offenderet; ex altera verò, cum in Petri catalogo Sanctorum, qui similia multa habet flagitia, & in Hieronymi catalogo Scriptorum Ecclesiasticorum, quem Victorius malè correxerat, Victorinum Pictaviensem Episcopum videret. Tunc autem nescius Demochares, quo in loco Victorinum statueret, eum cum Nectario confudit.

Possevinus dum in Apparatu sacro ait, *Victorinus Pitavienensis, rectius Pictaviensis*.

*sis* &c. errantes Honorium, Victorium, Democharem, & deprauatum Gratiani Decretum secutus est, atque illorum vestigia impleuit.

Miræus in Bibliotheca Ecclesiastica de Victorino perinde loquitur, quasi nullus vnquam eum Petauionensem seu Petabionensem Episcopum fecisset. Victorinum igitur simpliciter appellat *Pictauensem* Episcopum, cui eos tribuit libros, quos Petabionensi Hieronymus & Sophronius tribuerant. Hoc vti præstaret Hieronymi, Gelasij in decreto de scripturis authenticis, Honorij Augustodunensis & Baronij auctoritate vtendum sibi esse duxit. Sed immeritò, vt iam notavi, si tamen excipiat Baronijs, de quo proximè dicturus sum nonnihil. Miræus, vt apparet, rem non indagauit altius, & viam iniuit, quæ latè patebat in errorem.

## OBSERVATIO IV.

*Excipiuntur Baronij note ad quartum nonas  
Novembris Martyrologij Romani.*

**S**Vb finem capitis v. significauit, Martyrologium Romanum in iis, quæ ad

Victorinum Petabionensem attinent, superioris sæculi passum esse mutationem, scilicet ex *Petabionensi* factum esse *Pictauiensem*. Illatam huic Martyrologio nouitatem ita confirmat Baronius ad secundum Nouembris: *De quo Beda, Vfsuardus, Ado & Petrus in Catalogo lib. 10. cap. 12. scribit de eo sanctus Hieronymus de Scriptoribus Ecclesiasticis.*

At primùm quidem, cùm genuinum Bedæ non extet Martyrologium, de Victorino quid Beda censuerit, vtrum Petabionensem, an Pictauiensem vocauerit, immo vtrum Victorini meminerit, certò pronuntiari nequit. Nam Martyrologij, quod est sub nomine Bedæ vulgatum, dies pleni sunt omnes, contrà quàm Vfsuardus affirmat in Epistola ad Carolum Imperatorem: *Præterea, inquit, & venerabilem, Hieronymi scilicet & Bedæ Presbyterorum piis quamuis succinctis super hoc pronocabar descriptis ( Martyrologiis. ) Quorum prior breuitati studens, alter verò quamplures Calendarum dies intactos relinquens, multa inueniuntur huius operis præterisse necessaria: quos tamen secutus censui, & Flori memorabilis viri la-*

*riora iam in eo ipso negotio sequi vestigia, præsertim in secundo eiusdem libro. Hæc autem cum ita sint, non dubito, quin si Beda Victorini meminerit, eum Petabionensem appellarit. quo modo Vsuardus qui Bedam sequi se testatur, appellauit. Bedæ & Vsuardi tempore Victorinum nostrum omnes Petabionensem seu Petauionensem appellabant.*

Vsuardus & Ado de Victorino *Petabionensi* non *Pictauiensi* loquuntur; ut mirum planè sit, ista non aduertisse Baronium, qui aliàs in Petro non fallitur, sed fallitur ipse Petrus, dum ita scribit: *Victorinus Pictauiensis Episcopus sub Diocletiani persecutione martyrium passus est, qui scientia & doctrina clarus opuscula nonnulla sacra fidei perutilia compilauit. Commentarios enim edidit in Genesim, &c. Hæc Hieronymus libro de viris illustribus.* Fallitur, inquam, Petrus, cum Hieronymo tribuat, quæ Hieronymus non dixit. Nam in chirographis Hieronymi exemplaribus *Petabionensis*, non *Pictauiensis* legitur: deinde in editis Romæ exemplaribus, quæ Petrus videre potuit, *Petabionensis* habetur in *Victorino*, de

quo nunc agitur. Petrus aut Petri librar-  
 rius *Pictauensem* pro *Petabionensi* malè ac-  
 cepit. Tum quod rei caput est, Hierony-  
 mus in libro de viris illustribus *Petauionen-*  
*sem* dixit, non *Pictauensem*. Hæc res con-  
 fecta est cap. 1. huius Dissertationis. Ba-  
 ronius legit editionem Hieronymi recen-  
 sitam à Mariano Victorio, qui & Baro-  
 nium ipsum, & plures alios in eandem se-  
 cum traxit ruinam. Hoc autem magni ac-  
 præstantes viri habent, ut soli non errent,  
 sed & aliis errandi præbeant occasionem.  
 Ad annum Christi ccc l i i. in eadem cul-  
 pa persistit, sed tollendam esse breui scho-  
 lio significat Henricus Spondanus Anna-  
 lium Ecclesiasticorum breuiator.

Porro ubi nescio quam spuriam Syno-  
 dum Romanam admisit, in qua damna-  
 tur Victorinus, qui Paschales cyclos coin-  
 posuit, multum sibi creat negotij, ut Vi-  
 ctorinum nostrum à Victorino, ut loqui-  
 tur, Aquitano distinguat. Sed istud non  
 retracto, ne imitari videar eum, qui hoc  
 mali genus suo sibi iumento accersit.

## OBSERVATIO V.

*Duos apud Hieronymum non fuisse Victorinos, Pictaviensem unum, alterum Petavionensem.*

**S**I Erasmus, & si qui alij, duos fuisse apud Hieronymum Victorinos, Pictaviensem unum, qui & in catalogo, ubi sermo est de Papia, & in libro contra Heluidium laudetur; Petavionensem alterum, qui & in eodem catalogo, & in epistola lxxv. contra Vigilantium, & in caput xxxvi. Ezechielis notetur, crediderint, sine dubio errarunt. Idem enim Victorinus in locis illis quinque laudatur. Hieronymus quidem opera Victorini alterius recenset, sed Afer ille cum sit, hanc qua de agimus, causam nihil iuvat. Miramur duntaxat, Erasmus, virum ceteroquin accuratissimum in editione Hieronymi permisisse, ut Victorinus nunc *Pictaviensis*, nunc *Petabionensis* seu *Pictavionensis* vocetur; deinde in scholiis ad epitaphium Nepotiani Victorinum appellasse *Pictaviensem* Episcopum; tum ad librum contra Heluidium notasse, Victorinum ab Hieronymo *Pictaviensem* di-

Etum , vt eum à *Victorino Afro* , cuius meminit Augustinus , discerneret. quasi verò Victorinus Petauionensis, & Victorinus Afer non apprimè discernerentur. Porro in exemplaribus siue editis, siue manuscriptis , quibus vsus est Erasmus , credo talem fuisse n̄xuum , qualem exhibuit, sed debuit adhibitis pluribus bonæ notæ codicibus expungere.

Præposteram Mariani Victorij diligentiam nihil moror. Nam ille pro *Petabionensi* vbique *Pictauensem* posuit , cùm duobus in locis *Petabionensem* relinquere , & duobus in aliis restituere deberet , vbi *Pictauensis* falsò ponebatur. Mariani Victorij verba sunt ad librum de Scripturis Ecclesiasticis in Victorino : *Olim Pictabionensis , Pictauensis in libro contra Heluidium nuncupatur , & ita habet maior exemplarium pars. Alibi in Hieronymo Pictauionensis legitur, scilicet in epistola, quæ est contra Vigilantium.* quando maiorem exemplarium partem citat , de mandatis prælo exemplaribus sermonem facit. Quinque nihilominus editiones præcesserant, Romanæ duæ, Venetæ duæ, & Basiliensis vna, in quibus *Pictabionensis* seu *Pictauionensis*



exaratur. Reliquæ septem exhibent *Picta-  
uensem* : sex tamen sunt Erasmicæ omnes,  
ac proinde vna. De manuscriptis verò non  
loquitur, aut si loquitur, verè loqui non  
potest. Vtrumque ex cap. i. facilè perspi-  
citur, vbi quid habeat editus vel manu  
exaratus Hieronymi contra Heluidium  
commentarius, abundè repræsentatur.

## OBSERVATIO VI.

*Nondum tricesimus est annus, ex quo Picta-  
uensis Ecclesia Victorinum Episcopum  
agnouit suum.*

**H**ACTENUS tria potissimum confeci-  
mus, Victorinum in-primis non  
fuisse *Pictauiensem*, sed *Petauionensem*  
Episcopum: deinde quinque Hieronymi  
loca, quæ in vulgatis ab anno MDLXI. il-  
lius libris deprauata sunt, pristinæ inte-  
gritati restituenda esse, & pro *Pictauiensi*  
resumendum *Petauionensem*: tum erra-  
rum ab iis esse, qui rem istam aliter acce-  
perant. Nunc ad Ecclesiasticam historiam  
pertinet notare, quo primùm tempore, &  
quibus auctoribus *Pictauiensis Ecclesia*  
*Victorinum* in suum Episcopum admise-

rit. Id autem triginta abhinc annis accidit, duobus maximè collaborantibus viris Ioanne Fillæo Cantore & Officiali Piætauiensi, & Ioanne Bessio Aduocato Regio. Hic enim cùm esset vir doctus, audirètq; talis, dedit initium rei, quando Piætauiensium Episcoporum seriem contexuit, & in hac Victorinum ductus auctoritate eorum, quorum errores confiximus, principem collocavit. Ille verò rem absolvit, dum Bessio nimium credulus Calendario, quod reficiendum sibi sumpsit, Victorinum Episcopum & martyrem Piætauiensem inseruit. Hoc totum confirmavit Episcopus, dum hinc Victorini natalem festi duplicis ritu celebrari voluit, inde Litanias, ut vocat, Piætonicas cōposuit, in quibus Victorinus martyr & Piætauorum Episcopus orandus proponitur. Ad Litaniarum probationem attexuit vnicum Hieronymi librum de illustribus Ecclesiæ Scriptoribus. Ex quo etiam vna nocturni secundi lectio desumpta, Breuiarium occupavit. Hoc autem nunc ita exposuisset; confutasse est. Laudo quidem Episcopum, quòd Victorinum martyrem orandum & præcipua festiuitate colendum

Diœcesanis suis proponat, sed quòd cum Pictauorum antistitem faciat, laudare non possum. Primum adscribitur dogmatibus Catholicæ Ecclesiæ, in qua Sanctos beatam cum Christo vitam degentes cuiuscunque sint nationis, oramus, vt sint pro nobis aduocati & intercessores apud Deum. Secundum pertinet duntaxat ad historicum scribendi genus, in quo etiamsi prima lex sit, ne quid dicatur falsi, tamen *aliquando etiam doctissimi atque optimi regule Catholicæ defensores inter se salua fidei compage non consonant, & aliis alio de vna re melius aliquid dicit & verius, vt Augustini verbis vtat, quæ libro 1. contra Iulianum cap. vi. habentur.*

I A M in his, opinor, erudite FAVVÆ, te ipsum agnoscis, iam vides in hac opusculi mei nuncupatione non tam accepisse te beneficium, quàm dedisse. Quare in sinum tuum confugiat oportet, vt si quid in eo prauum sit ac distortum, tu castigator amantissimus & emendator contingas.





AD SUPERIOREM  
DISSERTATIONEM  
APPENDIX.

DE QVINQVE ILLVSTRIBVS  
VICTORINIS.



D superiorem Dissertationem, quæ de Petauionensi & continenter de quatuor aliis Victorinis. obseruari possunt, attexere, nec est meo quidem iudicio superuacaneum, nec quæsitæ, sed vltro oblata videtur occasio. Victorinos illustres eo dico sensu, quem in catalogo Hieronymus obiicit, recensens eos, qui scriptis nobilitarunt sese, siue in Ecclesia profecerint, siue ab Ecclesia defecerint.

VICTORINVS *Praxeana hæreseos*  
*defenjor.*

**I**GITUR primus, vt scructur ordotem-  
poris, est Victorinus ille, quem Ter-  
tullianus exprimit libro de præscriptione  
hæreticorum cap. ultimo: *Sed post hos om-  
nes, inquit, etiam Praxeas quidam hæresem*  
*introduxit, quam Victorinus corroborari cura-*  
*uit. Hic Deum Patrem omnipotentem, Iesum*  
*Christum esse dicit, hunc crucifixum, passum-*  
*que esse contendit & mortuum. Præterea sei-*  
*psum sibi sedere ad dexteram suam cum profa-*  
*na & sacrilega temeritate proponit.* Sic Hie-  
ronymus illustrem vocavit Tatianum ἐ-  
κπαπτωῦ principem, Bardesanem ex Va-  
lentini oppugnatore factum nouæ hære-  
seos conditorem, Nouatianum Catharo-  
rum auctorem, Basilium Ancyranum an-  
tistitem Macedonianæ partis columen,  
Donatum Africani schismatis archite-  
ctum, Asterium Arianæ factionis Philo-  
sophum, Photinum Sirmiensem Episco-  
pum propriæ hæreseos assertorem, & alios  
Christianæ fidei & pacis hostes, quos  
catalogo virorum illustrium adscripsit.

VICTORINVS *Petauionensis Episcopus  
& Martyr.*

**A**LTER est Petauionensis noster, à quo superatos Praxeam, Sabellium, Valentinum & ceteros Christianæ legis aduersarios Optatus scribit, & cuius libros Hieronymus in catalogo recenset. Vtriusque verba in Dissertatione retulimus, sicut & nonnulla alia, quæ in libro contra Heluidium, in epistola contra Vigilantium, in Papia Hierapolitano Episcopo, & in cap. xxxvi. Ezechielis Hieronymus laudat. Sed præterea Victorini quinquies adhuc meminit suis in operibus.

Et primò quidem in præfatione Commentarij super Matthæum: *Legisse me fateor ante annos plurimos in Matthæum Origenis viginti quinque volumina, & totidem eius homilias, commentariorumque interpretationis genus, & Theophili Antiochene urbis Episcopi commentarios, Hippolyti quoque martyris, & Theodori Heracleote, Apollinariique Laodiceæ, ac Didymi Alexandrini, & Latinorum Hilary, Victorini, Fortunatiani opuscula, & quibus etiam si parua carperem, dignum aliquid memoria scriberetur.*

Deinde in epistola ad Paulinum de Institutione Monachi : *Inclito Victorinus martyrio coronatus, quod intelligit, eloqui non potest.*

Tum in epistola ad Magnum oratorem Romanum : *Victorino martyri in libris suis licet desit eruditio, non tamen deest eruditionis voluntas.* Id autem intelligendum esse de sæcularium disciplinarum eruditione, docet argumentum epistolæ, qua libris Ecclesiasticis cur admisceret Ethnicorum literas, rationem reddit, & longa Patrum enumeratione se id, quod illi fecerant antea, facere demonstrat.

Quartò in primo Commentariorum Esaie ad Eustochium virginem præmio : *Ceterum apud Latinos grande silentium est, præter sanctæ memoriæ martyrem Victorinum, qui cum Apostolo dicere poterat, etsi imperitus sermone, non tamen scientia : scripsit enim in hunc Prophetam iuxta editiones quatuor usque ad visiones quadrupedum in deserto.*

Quintò in cap. iv. Ecclesiastæ ad illud, *Melior est puer pauper & sapiens, quàm rex senex & stultus : Origenes & Victorinus non multum inter se diversa senserunt.*

Cassiodorus in libro de diuinis lectionibus cap. v. *Secundus verò liber Salomonis, qui appellatur Ecclesiastes, à Beato Hieronymo potenter expositus est. & quibusdam interiectis: de quo libro & Victorinus ex oratore Episcopus nonnulla differuit. Rursus cap. vii. Mattheum Beatus Hieronymus iterum bis binis libris exposuit, quem etiam sanctus Hilarius in uno volumine declarauit, de quo & Victorinus ex oratore Episcopus nonnulla differuit. Iterum cap. ix. Apocalypsis sancti Hieronymi expositione conspicua est, de quo libro & Victorinus sapediectus Episcopus difficilia quaedam loca tractauit.*

His accedit præfatio, quæ Commentario Victorini in Apocalypsim præfigitur, ad Anatolium: ea autem sic se habet: *Diuerfos marina discrimina transuadantes inueniunt casus. Si turba ventorum fuerit vehementior, formido est. Si terga iacentis elementi moderatior crispauerit aura, pertimescunt insidias. Ita mihi in hoc videtur, quod misisti, volumine, quod in Apocalypsim explanationem videtur continere Victorini. Et est periculosum, & obtrektorum latratibus patens de egregij viri opusculis indicare. Nam & anterior Papias Hieropolites Episcopus, & Nepos in Egypti partibus*



partibus Episcopus de mille annorum regno, ita ut Victorinus senserunt. At quia me literis obtestatus es, nolui differre, sed ne spernerem precantem, maiorum statim libros reuolui, & quod in eorum commentariis reperi, Victorini opusculis sociavi. Ab iota inde, quæ ipse secundum literam senserit, à principio libri ad signum crucis, quæ ab imperitis vitata erant scriptoribus, correximus. Exinde usque ad finem voluminis addita esse cognosce. Iam tuum est discernere, & quid tibi placeat, comprobare.

Optimum mihi videtur iudicium, quod Sixtus Senensis libro v i. Bibliothecæ Annotat. c c c x l v i i. tulit de hac præfatione & de Victorini Commentariis in Apocalypsim. Est autem eiusmodi: Ceterum quod ad Victorini sententiam (de spatio mille annorum) attinet, cum ipse commentariolum, qui nunc in Apocalypsim eius nomine circumfertur, semel atque iterum ad perquirendum hunc errorem pertinaciter euoluissem, tantum abest, ut quod ei impingit Hieronymus, inuenerim, ut etiam in fine opusculi inciderim in apertam erroris huius confutationem, in qua cum auctor propositum Ioannis caput Catholicè differuisset,

demum commentarium suum conclusit his verbis: Ergo audiendi non sunt, qui mille annos regnum terrenum esse confirmant, qui cum Cherintho haretico sentiunt. Verisimile est aut opus non esse Victorini, & e mentitam esse præfationem sub Hieronymi titulo volumini præfixam, aut inde vel ab Hieronymo, vel ab alio amico lectore sublatam esse absurdam Victorini explanationem, & in locum ipsius eam, qua nunc habetur, repositam. Quæ una coniectura ceteris probabilitate mihi videretur antecellere, si penitus constaret à Victorino explanatam Apocalypsim fuisse totam: Sed ne id constet, Cassiodorus impedit, qui tantum illi tribuit difficilium quorundam Apocalypseos locorum enodationem. Quo fit ut me recipiam ad aliam coniecturam, qua merito dubitari potest, utrum Hieronymi sit ea, quam retulimus ad Anatolium Præfatio. Ad Victorini commentarium in Apocalypsim, quem habemus in Bibliotheca Patrum, quod attinet, fieri potest, ut (si Cassiodoro creditur) partim illius sit, partim alterius: illius quidem in iis, quæ difficilium locorum explicationem contineant:

alterius verò, qui reliquorum locorum expositionem suppleuerit. In summa res ista tota in eum adducta est statum, ut certum sit, nihil esse certi, quod verè affirmatèque dici queat. De reliquo in Dissertatione notauimus diem, quo natalis Victorini in Ecclesia celebretur.

VICTORINVS *Afer, Rhetor urbis Romæ.*

**T**ERTIVS est rhetor ille, cuius conuersionem eleganter narrat Augustinus lib. Confessionum VIII. cap. II. *Perrexi ergo ad Simplicianum patrem in accipienda gratia tua tunc Episcopi Ambrosij, quem verè ut patrem diligebat. Narraui ei circumitus erroris mei. Vbi autem commemorauit legisse me quosdam libros Platoniorum, quos Victorinus quondam Rhetor urbis Romæ, quem Christianum defunctum esse audieram, in Latinam linguam transtulisset, gratulatus est mihi, quòd non in aliorum Philosophorum scripta incidissem, plena fallaciarum & deceptionum secundum elementa huius mundi. In istis autem omnibus modis insinuari Deum & eius verbum. Deinde ut me exhortaretur ad humilitatem Christi sapientibus absconditam, & reuelatam paruulis, Victorinum ipsum recorda-*

tus est, quem, Roma cùm esset, familiarissimè  
 nouerat, deque illo mihi narrauit, quod non  
 filebo. Habet enim magnam laudem gratia tua  
 confitendam tibi, quemadmodum ille doctis-  
 simus senex, & omnium liberalium doctrina-  
 rum peritissimus, quisque Philosophorum tam  
 multa legerat, & diiudicauerat & dilucida-  
 uerat, Doct̃or tot nobilium Senatorum, qui  
 etiam ob insigne præclari magistrij, quod ci-  
 ues huius mundi eximium putant, statuam in  
 Romano foro meruerat & acceperat, usque ad  
 illam ætatem venerator idolorum, sacrorumque  
 sacrilegorum particeps, quibus tunc tota ferè  
 Romana nobilitas inflata spirabat, populûsque  
 etiam omnigenum deûm monstra, & Anubem  
 latratorem, quæ aliquando contra Neptunum  
 & Venerem, contraque Minervam tela tenue-  
 runt, & à se victis iam supplicabat, quæ iste  
 senex Victorinus tot annos ore terrificrepe de-  
 fensitauerat, non erubuerit esse puer Christi  
 tui, & infans fontis tui subiecto collo ad humi-  
 litatis iugum, & edomita fronte ad crucis op-  
 probrium. O Domine, Domine, qui inclinasti  
 celos & descendisti, tetigisti montes & fumi-  
 gauerunt. Quibus modis te insinuasti illi pe-  
 ctori. Legebat sicut ait Simplicianus, sanctam  
 scripturam, omnesque Christianas literas in-

uestigabat studiosissimè & perscrutabatur, & dicebat Simpliciano, non palam, sed secretiùs & familiaritùs: Noueris me iam esse Christianum. & respondebat ille: Non credam, nec deputabo te inter Christianos, nisi in Ecclesia Christi te videro. Ille autem irridebat eum dicens: Ergòne parietes faciunt Christianos? Et hoc sæpè dicebat, iam se esse Christianum, & Simplicianus sæpè illud respondebat, & sæpè ab illo parietum irrisio repetebatur. Amicos enim suos verebatur offendere, superbos demoniolas, quorum ex culmine Babylonica dignitatis quasi ex Cedris Libani, quas nondum contriuerat Dominus, grauiter ruituras in se inimicitias arbitrabatur. Sed posteaquam legendo & inhiando hausit firmitatem, timuitque negari à Christo coram Angelis sanctis, si eum timeret coram hominibus confiteri, reusque sibi magni nominis apparuit, erubescendo de sacris sacrilegis superborum demoniorum, quæ imitator superbus acceperat: depudiuit vanitati & erubuit veritati; subitoque & inopinatus ait Simpliciano, ut ipse narrabat, Eamus in Ecclesiam, Christianus volo fieri. At ille non capiens se letitia, perrexit cum eo. Vbi autem imbutus est primis instructionum sacramentis, non multo post etiam

*nomen dedit, ut per baptismum regeneraretur, mirante Roma, gaudente Ecclesia. Superbi videbant & irascebantur, dentibus suis stridebant, & tabescebant. Seruo autem tuo Dominus Deus erat spes eius, & non respiciebat in vanitates & insanias mendaces. Denique ut ventum est ad horam profitende fidei, quæ verbis certis conceptis retentisque memoriter de loco eminentiore in conspectu populi fidelis Romæ reddi solet ab eis, qui accessuri sunt ad gratiam tuam, oblatum esse dicebat Victorino à presbyteris, ut secretius redderet, sicut nonnullis, qui verecundia trepidaturi videbantur, offerri mos erat: Illum autem maluisse salutem suam in conspectu sanctæ multitudinis profiteri: Non enim erat salus, quam docebat in Rhetorica, & tamen eam publicè professus erat. Quanto minùs ergo vereri debuit mansuetum gregem tuum pronuncians verbum tuum, qui non verebatur in verbis suis turbas insanorum? Itaque ubi ascendit, ut redderet, omnes sibi inuicem, quisque ut eum nouerat, instrepuerunt nomen eius strepitu congratulationis? Quis autem ibi non eum nouerat? Et sonuit pressò sonitu per ora cunctorum collatantium, Victorinus, Victorinus. Cui sonuerunt exultatione, quia videbant eum, & cito siluerunt intentione, ut au-*

dirent eum. Pronunciauit ille fidem veracem  
 præclara fiducia, & volebant eum omnes rapere  
 intro in cor suum, & rapiebant amando & gau-  
 dendo. & post alia sub finem cap. iv. &  
 sub initium cap. v. *Quanto igitur gratius*  
*cogitabatur Victorini pectus, quod tanquam*  
*inexpugnabile receptaculum diabolus obti-*  
*nuerat Victorini lingua, quo telo grandi*  
*& acuto multos peremerat: tanto abundan-*  
*tius exultare oportuit filios tuos. quia rex*  
*noster alligauit fortem, & videbant vasa*  
*eius erepta mundari & aptari in honorem*  
*tuum, & fieri utilia Domino ad omne opus*  
*bonum. Sed ubi mihi homo tuus Simplicia-*  
*nus de Victorino ista narrauit, exarsit ad imi-*  
*tandum. Ad hoc enim & ille narrauerat.*  
*Posteaquam verò & illud addidit, quod Im-*  
*peratoris Iuliani temporibus lege data prohi-*  
*biti sunt Christiani docere literaturam & ora-*  
*toriam: quam legem ille amplexus, loqua-*  
*cem scholam deferere maluit, quàm verbum*  
*tuum, quo linguas infantium facis disertas,*  
*non mihi fortior, quàm felicior visus est, quia*  
*inuenit occasionem vacandi tibi. Hæc de*  
*Victorino sanctus Augustinus, quæ om-*  
*nia cum ob pulchritudinem historię,*  
*tum ob lectoris verè Christiani solatium,*

36 DE QVINQVE VICTORINIS  
& priscorum Ecclesiæ in baptisando rituum descriptionem placuit referre.

De Victorino Afro tribus in locis Hieronymus verba facit; Et primò quidem in Chronico ad annum cccclv. *Victorinus rhetor & Donatus grammaticus preceptor meus Romæ insignes habentur. è quibus Victorinus etiam statuam in foro Traiani meruit.* Deinde in Catalogo de viris illustribus: *Victorinus natione Afer Romæ sub Constantio principe Rhetoricam docuit, & in extrema senectute, Christi se tradens fidei scripsit aduersus Arium libros more dialectico valdè obscuros, qui ab eruditis non intelliguntur, & Commentarios in Apostolum.* Editi sunt aduersus Arium libri quatuor quos habet Bibliotheca Patrum. Iis accedunt carmen de tribus Macchabæis ab Antiocheno rege interfectis, & de Trinitate hymni tres. Qui versus interpretem in nonnullis benignum exigunt. Commentarij in Apostolum vel periere, vel adhuc in Bibliothecarum forulis delitescunt. Iacobus Sirmondus anno m. dc. xxx. huius Victorini libros edidit duos, alterum contra Iustinum Manichæum, alterum de principio dici. Sed



corum non meminit Hieronymus. Quamobrem hi libri vel non pertinent ad Victorinum Afrum, atque ita in Sirmondi manus inciderunt, *Ἰουδὴ πῆγαφοι*, vel Hieronymus non omnes illius libros recensuit aut vidit. Horum autem utrum verum sit, non est facile pronuntiare.

Ad extremum Hieronymus Victorinum istum attingit in præfatione Commentarij epistolæ ad Galatas: *Aggrediar opus intentatum ante me lingue nostræ scriptoribus, & à Græcis quoque ipsis vix paucis, ut rei poscebat dignitas, usurpatum. Non quia ignorem Caium Marium Victorinum, qui Romæ pueros rhetoricam docuit, edidisse Commentarios in Apostolum, sed quòd occupatus ille eruditione secularium literarum scripturas omnino sanctas ignorauerit, & nemo possit quamvis eloquens de eo benè disputare, quod nesciat.*

Cassiodorus in Rhetorica sua de Victorino sic verba facit: *Hæc licet Cicero Latine eloquentia lumen eximium per varia volumina copiosè nimis, & diligenter effuderit, & in arte rhetorica duobus libris videatur amplexus, quorum commenta à Mario Victorino composita in Bibliotheca mea vobis videor reliquisse. & post alia: Præter-*

*ea secundum Victorinum Enthymematis altera est definitio. Idem in libro de Dialectica: Modos hypotheticorum syllogismorum si quis planius nosse desiderat, legat librum Marij Victorini, qui inscribitur de syllogismis hypotheticis.*

Gerbertus, qui ex Remensi Archiepiscopo factus est Rauennensis, & ex Rauennensi Romanus Pontifex Silvester II. Victorini Rhetoricam sibi describi curauit. qua de re sic ad Rainaudum Monachum scribit epist. cxxx. *Vnum autem interim plurimum exposco, quod & sine periculo ac detrimento tui fiat, & me tibi quam maximè in amicitia constringat. Nosti quanto studio librorum exemplaria undique conquiram, nosti quot scriptores in urbibus, aut in agris Italiæ passim habeantur. Age ergo & te solo conscio ex tuis sumptibus fac, ut mihi scribantur M. Manilius de Astrologia, Victorinus de Rhetorica, Demosthenes ophthalmicus.*

Annus agebatur millesimus quingentesimus nonagesimus nonus, cum Lutiæ apud Ambrosium Droartum prodit in lucem ex Victorini libris vnus, qui sic inscribitur: *Marij Victorini, Rhetoris*

*urbis Romæ, expositio in primum Rhetoricon Ciceronis. Prodiit verò cum pluribus antiquorum Rhetorum commentariis, quæ idem ferè tractant argumentum.*

VICTORINVS *Masiliensis.*

QUARTVS est, quem Gennadius in virorum illustrium albo collocat: *Victorinus rhetor Masiliensis ad filij sui Etherij personam commentatus est in Genesim, id est à principio libri usque ad obitum Abrahamæ Patriarchæ. Quatuor versuum edidit libros Christiano quidem & pio sensu, sed utpote seculari literatura homo occupatus, & nullius magisterio in diuinis scripturis exercitatus, leuioris ponderis sententias figurauit. Moritur Theodosio & Valentiniano regnantibus.*

VICTORINVS *Lampadius Orator.*

QUINTVS denique Victorinus Lampadius orator à Photio memoratur Cod. ci. Bibliothecæ: *Lectæ sunt, inquit, Victorini Lampadij Antiocheni orationes Consulares variæ simul & Imperatoriæ in Zenonis Augusti laudem. quo imperante ad extremam hic peruenerat senectutem. Dictio-*

## 60 DE QVINQVE VICTORINIS

*nem eius, in qua nihil redundans, perspicuitas, usitatusque loquendi modus exornant. Vtrum Victorinus iste Christianus fuerit, necne, ignorare me penitus fateor. Verum etsi fuit gentilis, æquè tamen potuit ac Victorinus Praxeanae sectæ defensor ceteris accenseri.*

Hic non attingo eum, quem Baronius aliquando, & recentiores quidam alij falso Victorinum Aquitanum appellant. Is enim non Victorinus dicitur, sed Victorius, qui rogatu Hilari Papæ cyclum Paschalem edidit anno CCCCLXIII. Victoriū hunc natione Aquitanum in Catalogo virorum illustrium ponit Gennadius, qui æqualis cū fuerit, cūque de facie nosse potuerit, quo nomine vocandus foret, neutiquam ignorauit. Concilium Aurélianense IV. quod anno Christi D. XLV. habitum est, eandem appellationem retinet cap. 1. *Placuit itaque Deo propitio, ut sanctum Pascha secundum laterculum Victorij, ab omnibus sacerdotibus vno tempore celebretur.*

Baronius quidem anno CCCIII. & anno CCCXXIV. meminit Victorini cuiusdam Episcopi, quem ob redargutos Paschales

Ecclesiæ cyclos Romana Synodus altera damnarit. Sed Victorinus iste ac Synodus nullum habent apud veteres testimonium sui. Fuerunt progressu temporis, qui Siluestro primo Synodos falsas adscripserint, & res in iis gestas supposuerint. Quare annalium conditor, ut istum Victorinum à Victorino martyre & Pictaviensi, ut credit, Episcopo distinguat, gratuitam sibi creat molestiam, & cum larua contendit. Nam prius ex monumentis certis liquere debuit, utrum Victorinus extiterit aliquis, qui receptos Ecclesiæ Paschales cyclos accusauerit, quàm in assignando tali discrimine studium & operam nauare. Ad constituendum ὑποβολιμῶν Victorinum, Victorinus Episcopus, & Victorius Aquitanus de suo non nihil contulerunt. Vnus nomen & dignitatem, alter Paschales cyclos, quos à Victorino Episcopo reprehensos hominis noui fabricator confinxit.

Non attingo quoque Victorinos plures, qui sæuiantibus in Christianos Imperatoribus ethnicis ad honorifica Ecclesiæ vulnera peruenerunt. Quamcunque in sæculo vitam egerant antea, etiam lon-

gissimam, ad illud tota redacta est punctum temporis, quod excepit triumphatæ mortis gloria, & vitæ alterius felicitas nunquam desitura. Qui hoc semel observauit, Victorinorum illorum historiam confecit omnem. Inde Vsuardus & Ado eos collocarunt in Sanctorum librario, assignaruntque dies, quibus Christi religionem sanguine dedicarunt suo, & verè tandem viuere cœperunt.


## • FINIS.



Jeremias cap. vi. vers. xvi.

*Hac dicit Dominus : State super vias , & videte , & interrogate de semitis antiquis , qua sit via bona , & ambulate in ea.*







Handwritten marks at the top of the page, possibly "K 0 0 1".



